

唐書合鈔

唐書卷第二百十二

列傳五

李光進 弟光顏

烏重胤 石洪從新書增

王沛 子逢

李珣

李祐

董重質

楊元卿 子延宗

牛元翼 從新書增 傅良

劉悟 子從諫 孫稹 李師誨

劉沔

石雄

李光進本河曲部落稽阿跌之族也 貞觀中內屬以其地為雞田州世襲

刺史父良臣襲雞田州刺史隸朔方軍光進姊適舍利葛

旃殺僕固瑒而事河東節度使辛雲京光進兄弟少依

葛旃因家於太原光進勇毅果敢其武藝兵畧次於葛

旃

從馬燧救臨沼戰洹水有功歷前後
軍牙門將兼御史大夫代州刺史

肅宗自靈武觀

兵光進從郭子儀破賊收兩京累有戰功至德中授代

州刺史封范陽郡公食邑二百戶上元初郭子儀爲朔

方節度以軍討大同橫野清夷范陽及河北殘寇用光

進爲都知兵馬使尋遷渭北節度使永泰初進封武威

郡王大曆四年檢校戶部尚書知省事未幾又轉檢校

刑部尚書兼太子太保是歲冬十月葬母於京城之南

原將相致祭者凡四十四幄窮極奢靡城內士庶觀者

如堵

案自肅宗靈武觀兵以下皆李光弼弟光
進事非此阿跌光進也此屬錯簡當刪

元和四

年王承宗叛范希朝引師救易定表光進爲步都虞候

戰於木刀溝光進有功六年本紀拜銀青光祿大夫檢

校工部尚書充單于大都護振武節度使詔以光進夙

有誠節克著茂勲賜姓李氏其弟光顏除洛州刺史充

本州團練使兄弟恩澤同時人皆歎異八年遷靈武節

度使光進嘗從馬燧救臨洛戰洹水收河中皆有功前

後軍中之職無所不歷中丞大夫悉曾兼帶先是救易

定之師光進光顏皆在其行故軍中呼光進爲大大夫

光顏爲小大夫十年七月卒光進兄弟少以孝睦推於

軍中及居母喪三年不歸寢室光顏先娶妻其母委以

家事母卒光進始娶光顏使其妻奉管鑰家籍財物歸
於其妯光進命反之且謂光顏曰新婦逮事母嘗命以
主家不可改也因相持泣良久乃如初卒時年六十五
贈尚書左僕射

光顏

字光遠

與兄光進以葛旃善騎射兄弟自幼皆師之

葛旃獨許光顏之勇健已不能逮及長從河東軍爲裨

將

節度使馬燧謂曰若有奇相終必光大解所佩劍贈之

討李懷光楊惠琳皆有

功後隨高崇文平蜀擐旗斬將出入如神由是稍稍知
名自憲宗元和已來歷授代洛二州刺史兼御史大夫
九年將討淮蔡九月遷陳州刺史充忠武軍都知兵馬

使踰月遷忠武軍節度使檢校工部尚書會朝廷徵天下兵環申蔡而討吳元濟詔光顏以本軍獨當一面光顏於是引兵臨澨水抗洞曲明年五月破元濟之師於時曲初賊衆晨壓光顏之壘而陣光顏不得出乃自毀其柵之左右出騎以突之光顏將數騎冒堅而衝之出入者數四賊衆盡識矢集於身如蝟其子攬光顏馬鞅止其深入光顏舉刃叱之乃退於是人爭奮躍賊乃大潰死者數千人捷聲至京師人人相賀時伐蔡之師大小凡十餘鎮自裴度使還唯奏光顏勇而知義終不辱命至是果立功焉是歲十一月光顏又與懷汝節度烏

重脣同破元濟之衆於小澥河平其柵初都統韓宏令諸軍齊攻賊城賊又徑攻烏重脣之壘重脣禦之中數槍馳請救於光顏光顏以小澥橋賊之堡也乘其無備使田穎宋朝隱襲而取之乃平其城塹由是克救重脣韓宏以光顏違令取穎及朝隱將戮之穎及朝隱勇而材軍中皆惋惜之光顏畏宏不敢留會中使景忠信至知其情乃矯詔令所在械繫之走馬入見具以本末聞憲宗赦忠信矯詔罪令卽往釋穎及朝隱宏及光顏迭以表論憲宗謂宏使曰穎等違都統令固當處死但光顏以其襲賊有功亦可宥之軍有三令五申宜捨此以

收來效及以詔諭宏宏不悅十一年光顏連敗元濟之衆拔賊凌雲柵憲宗大悅賜其告捷者奴婢銀錦進位檢校尚書左僕射十二年四月光顏敗元濟之衆三萬於鄆城其將張伯良奔於蔡州殺其賊什二三獲馬千匹器甲三萬聯皆畫雷公符仍書云速破城北軍尋而鄆城守將鄧懷金請以城降光顏許之而收鄆城初鄧懷金以官軍圍青陵城絕其歸路懷金懼謀於鄆城令董昌齡昌齡母素誠昌齡令降因此勸懷金歸款於光顏且曰城中之人父母妻子皆質於蔡州如不屈而降則家盡屠矣請來攻城我則舉烽求救救兵將至官軍

逆擊之必敗此時當以城降光顏從之賊果敗走於是
昌齡執印率吏列於門外懷金與諸將素服倒戈列於
門內光顏受降乃入羅城其城白壤五十餘步時韓宏
爲汴帥驕矜倔強常倚賊勢索朝廷姑息惡光顏力戰
陰圖撓屈計無所施遂舉大梁城求得一美婦人教以
歌舞絃管六博之藝飾之以珠翠金玉衣服之具計費
數百萬命使者送遺光顏冀一見悅惑而怠於軍政也
使者卽齎書先造光顏壘曰本使令公德公私愛憂公
暴露欲進一妓以慰公征役之思謹以候命光顏曰今
日已暮明旦納焉詰朝光顏乃大宴軍士三軍咸集命

使者進妓妓至則容止端麗殆非人間所有一座皆驚
光顏乃於座上謂來使曰令公憐光顏離家室久捨美
妓見贈誠有以荷德也然光顏受國家恩深誓不與逆
賊同生日月下今戰卒數萬皆背妻子蹈白刃光顏奈
何以女色爲樂言訖涕泗嗚咽堂下兵士數萬皆感激
流涕乃厚以縑帛酬其來使俾領其妓自席上而迴謂
使者曰爲光顏多謝令公光顏事君許國之心死無貳
矣自此兵衆之心彌加激勵及裴度至行營率賓從於
方城池口觀板築五溝賊遽至注弩挺刃勢將及度光
顏決戰於前以却之時光顏預慮其來先使田布以二

百騎伏於溝中出賊不意交擊之度方獲免布又先扼其溝中歸路賊多棄騎越溝相牽墜壓而死者千餘人是日微光顏之救度幾陷矣是月賊知光顏勇冠諸將乃悉其衆出當光顏之師時李愬乘其無備急引兵襲蔡州拔之獲元濟董重質棄洞曲軍入城降愬光顏知之躍馬入賊營大呼以降賊衆萬餘人皆解甲投戈請命賊平加檢校司空十三年春命中官宴光顏於居第賜芻米二十餘車憲宗又御麟德殿召對賜金帶錦綵朝廷東討李師道授光顏義成軍節度使

許以忠武兵自隨

至鎮

尋赴行營數旬之內再敗賊軍於濮陽

拔斗門

殺戮數千

人進軍深入

上言許鄭兵合不可用遂復鎮忠武

十四年西蕃入寇移授

邠寧節度使時鹽州爲吐蕃所毀命李文悅爲刺史令
光顏充句當修築鹽州城使仍許以陳許六千人隨赴
邠寧是歲吐蕃侵涇原自田縉鎮夏州以貪猥侵撓党
項羌乃引吐蕃入寇及蕃軍攻涇州邊將郝玼血戰始
退初光顏聞賊攻涇州料兵赴救邠師誼然曰人給五
十千而不識戰陣彼何人也常額衣資不得而前蹈白
刃此何人也憤聲恟恟不可遏光顏素得士心曲爲陳
說大義言發涕流三軍感之亦泣下乃忻然卽路擊賊
退之穆宗卽位就加特進仍與一子四品正員官尋詔

赴闕賜開化里第進加同中書門下平章事穆宗以光
顏功冠諸將故召赴闕譙賜優給已而帶平章復鎮所
以報勲臣也長慶初遷鳳翔節度使依前檢校司空同
中書門下平章事歲末復授許州節度使朝廷以光顏
昔鎮陳許頗得士心將討鎮冀故有此拜赴鎮日宰相
百僚以故事送別於章敬寺穆宗御通化門臨送之賜
錦綵銀器良馬玉帶等物二年討王廷湊命光顏兼深
州行營諸軍節度使光顏旣受命而行懸軍討賊艱於
饋運朝廷又以滄景德棣等州俾之兼管以其鄰賊之
郡可便飛輓光顏以朝廷制置乖方賊帥連結未可朝

夕平定事若差跌卽前功悉棄乃懇辭兼鎮尋以疾作

表祈歸鎮朝廷果討賊無功而赦廷湊四年敬宗卽位

正拜司徒汴州李齊逐其帥叛詔光顏率陳許之師討

之營於尉氏與汴州戰琵琶溝未陣薄之賊走俄而誅齊遷太原尹北

京留守河東節度使進階開府儀同三司仍於正衙受

冊司徒兼侍中二年九月卒年六十六廢朝三日贈太

尉諡曰忠及葬文宗以其功高復賜帛二千疋光顏性忠義善撫士其下樂爲用許師勁悍常爲諸

軍鋒故數立勲王仙芝黃巢反諸道告急多請以助守

大校曹師罕以千五百人隸招討使宋威張貫以四千

人隸副使曾元裕僖宗倚許軍以屏蔽東都有請以爲

援率不報大將張自勉討雲南党項龐勛亂解圍壽州

戰淮口以功累擢右威衛上將軍至是表請討賊詔乘

傳赴軍解宋州圍威忌自勉成功請以隸麾下且欲殺

之宰相得其謀不聽以自勉代元裕

新書贊曰世皆謂李愬提孤旅入蔡縛賊為奇功殊未知光顏於平蔡為多也是時賊戰日窘盡取銳卒抗光顏憑空堞以居故愬能乘一切勢出賊不意然則無光顏之勝愬烏能奮哉

烏重胤

字保君河東將承玘子

潞州牙將也元和中王承宗叛王

師加討潞帥盧從史雖出軍而密與賊通時神策行營

吐突承璀與從史軍相近承璀與重胤謀縛從史於帳

下

士持兵合譴重胤叱曰天子有命從者賞違者斬

是日重胤戒嚴潞軍無敢

動者憲宗賞其功授潞府左司馬遷懷州刺史充河陽

三城節度使

封張掖郡公

會討淮蔡用重胤壓境仍割汝州

隸河陽自王師討淮西三年重胤與李光顏犄角相應

大小百餘戰以至元濟誅就加檢校尚書右僕射轉司

空

進封國公

蔡將有李端者過潞河降重脣其妻爲賊束縛

於樹嚮食至死將絕猶呼其夫曰善事烏僕射其得人

心如此元和十三年代鄭權爲橫海軍節度使旣至鎮

上言曰臣以河朔能拒朝命者其大畧可見蓋刺史失

其職反使鎮將領兵事若刺史各得職分又有鎮兵則

節將雖有祿山思明之姦豈能據一州爲叛哉所以河

朔六十年能拒朝命者祇以奪刺史縣令之職自作威

福故也臣所管德棣景三州已舉公牒各還刺史職事

訖應在州兵並令刺史收管又景州本是弓高縣請却

廢爲縣歸化縣本是草市請廢縣依舊屬德州詔並從之由是法制修立各歸名分及屯軍深州重脩以朝廷

制置失宜賊方憑陵未可輕進觀望累月穆宗急於誅

叛遂以杜叔良代之以重脩爲太子太保檢校司徒兼興元

尹充山南西道節度使召至京師復以本官爲天平軍

節度鄆曹濮等州觀察等使文宗初真拜司空李同捷據滄州

請襲父位朝廷不從議者慮狡童拒命欲以重臣代乃

移鎮兗海加太子太師平章事俾兼領滄景節度仍割

齊州隸之案紀同捷移鎮兗海重脩兼領滄景本兩人

同捷文加太子太師蓋望不勞師而底定制出旬日重

上闕重脩文故耳

肩卒年六十七贈太尉諡懿穆

重肩出自行間及為長帥赤心

奉上能與下同甘苦所至立功未嘗矜伐而善待賓僚

禮分周至當時名士如溫造石洪咸願依之身歿之日軍士

二十餘人皆割股肉以為祭醑雖古之名將無以加焉

子漢宏嗣起復授左領軍衛將軍漢宏上表乞終服紀

文宗嘉詔從之服闋方授官石洪者字滂川其先姓烏石蘭後獨以石為氏有至

行舉明經為黃州錄事參軍罷歸東都十餘年隱居不

出公卿數薦皆不答重肩鎮河陽求賢者以自重或薦

洪重肩曰彼無求於人其肯為我來邪乃具書幣邀辟

書召為昭應尉集賢校理

王沛許州許昌人年十八有勇決許州節度使上官浣奇

其才以女妻之署爲牙門將及浚卒子壻田偁迫脅浚
子欲邀襲位懼監軍使不順其事將結謀伏兵以圖之
沛竊知其謀密告監軍盡擒其黨於伏匿之所監軍范
日用以其事聞德宗乃以陳許行軍司馬劉昌裔總統
其軍賜沛手詔令護浚之子赴上都旣至召見德宗謂
之曰據卿忠義寵宜加等但昌裔所奏祇請加監察御
史朕意殊爲不足卿速歸便宜付昌裔更令奏來遂驛
騎而還未至許州拜開府儀同三司兼御史中丞依前
本職吳元濟反李光顏受命攻討奇沛節槩署行營兵
馬使別統勁兵屯於近郊及軍合連破蔡寇頻詔進軍

諸將觀望無敢先渡澱河沛率兵五千夜渡澱河合流
口徑扼賊喉而成城自是河陽宣武太原魏博等軍繼
渡犄角進攻鄆城沛先結壘與賊對賊將鄧懷金率衆
面縛而降蔡賊平沛隨李光顏入朝光顏具陳沛功加
御史大夫旣還鎮光顏受詔討鄆寇及李師道誅詔分
許州兵戍於邠以沛爲都將救鹽州擊退吐蕃以功加
寧州刺史遷陳州李汭反詔沛兼忠武節度副使率師
討汭汭平加檢校右散騎常侍遷兗海沂密節度觀察
等使此邦新造人情獷驚沛明申法令選蒐軍政葺年
大理明年改檢校工部尚書充忠武軍節度陳許蔡觀

察等使

大和元年

卒於鎮贈右僕射子逢

逢少沈勇從父征伐有功爲忠武都知兵馬使大和中

入宿衛歷諸衛將軍從石雄劉沔破迴紇於天德性果

決用法嚴其時有二千人不上陣官賜賞給逢皆不與

或非之逢曰健兒向前冒白刃若無功而賞其如冒刃

者何

武宗以逢用法嚴使宰相李德裕議之逢曰戰者前蹈白刃不以法人孰用命

王宰攻劉

稹逢領陳許七千人屯翼城代田令昭賊平檢校左

新書

右散騎常侍累遷至忠武軍節度陳許觀察等使

李珙山東甲姓代修婚姻至珙不好讀書唯以弓馬爲

務長六尺餘氣貌魁岸嘗詣澤潞謁李抱真異之將選

爲衙門將旋以酒酣使氣復欲棄之都將王虔休謂抱
真曰李珙奇士也若不能用不如殺之無爲他人所得
抱真死虔休爲帥乃依虔休累爲昭義大將吐突承璀
之擒盧從史烏重胤實預其謀珙初不知將救從史聞
重胤受朝旨乃觀望不進重胤以此德之後領河陽乃
置於麾下然朝廷以與從史厚善竟出爲北邊一校元
和十年征淮西重胤懇表爲諸道行營都虞候詔特從
之俄以母憂去職服闋除右武衛上將軍長慶四年八
月卒年六十四廢朝一日

李祐

字慶之

本蔡州牙將事吳元濟驍勇善戰自王師討

淮西祐爲行營將每抗官軍皆憚之元和十三年爲李
愬所擒愬知祐有膽畧釋其死厚遇之推誠定分與同
寢食往往帳中密語達曙不寐人有耳屬於外者但屢
聞祐感泣聲而軍中以前時爲祐殺傷者多營壘諸卒
會議皆恨不殺祐愬以衆情歸怨慮不能全因送祐於
京師乃上表救之憲宗特恕遂遣祐賜愬愬大喜卽以
三千精兵付之祐所言無有所疑竟以祐破蔡擒元濟
以功授神武將軍遷金吾將軍檢校左散騎常侍夏州
刺史御史大夫夏綏銀宥節度使寶厯初入爲右金吾
大將軍尋以吐蕃入寇出爲涇州刺史涇原節度使

案紀

祐未嘗爲涇原拜涇
原者乃李祐非祐也大和初討李同捷遷檢校戶部尚
書滄州刺史滄德景節度使
累檢校尚書左僕射大和三年五月
卒

董重質本淮西牙將吳少誠之子壻也性勇悍識軍機
善用兵及元濟拒命重質又爲謀主領大軍當王師連
歲不拔皆重質之謀也元和十二年宰相裴度督兵淮
西至鄆城元濟乃悉發左右及守城之卒委重質而拒
度時李愬乘虛入蔡旣擒元濟重質之家在蔡愬乃安
卹之仍使其子持書禮以召重質重質見其子知城已
陷及元濟囚窘之狀乃慨然以單騎歸愬白衣叩伏愬

揖登階以賓禮與之食憲宗欲殺之愬奏許以不死而
來降請免之且乞於本軍驅使於是貶春州司戶參軍
明年轉太子少詹事委武寧軍收管驅使仍加金紫十
七年徵入授左神武軍將軍知軍事兼御史中丞仍賜
金帛與有功者等尋授鹽州刺史又遷左右神策及諸
道劍南西川行營節度使檢校左散騎常侍大和四年
又轉夏綏銀宥節度使五年又加檢校工部尚書重質
訓兵立法羌戎畏服

終右龍
武統軍

八年八月卒贈尚書左僕

射

楊元卿祖子華德州安陵縣丞父寓申州鍾山縣令元

卿少孤慷慨有才畧及冠尚漂蕩江嶺之表縱遊放言
人謂之狂生時吳少誠專蔡州朝廷姑息之元卿白衣
謁見署以劇縣旋辟爲從事奏授試大理評事亦事少
陽後奏轉監察裏行因上奏宰相李吉甫深加慰納自
是一歲或再隨奏至京師元卿每與少陽言論以大義
乃爲兇黨所構賴節度判官蘇肇保持故免元卿潛奉
朝廷內耗少陽之事及少陽死其子元濟繼立元卿說
曰先尚書性恠諸將皆饑寒今須布惠以自固也府中
有無元卿熟知之曷若散聘諸道卑辭厚禮以丈人行
呼羣帥庶幾一助而諸將大獲矣元卿願將留後表上

聞朝廷安得不從哉元濟許之元卿卽日離蔡以賊勢盈虛條奏潛請詔諸道拘留使者及元濟覺元卿妻陳氏并四男並爲元濟所殺同圻一射塚蘇肇以保持元卿亦同日被害詔授元卿岳王府司馬尋遷太子僕元和十三年授蔡州刺史兼御史中丞未行改授光祿少卿初朝廷比令元卿與李愬會議於唐州東境選要便處權置行蔡州如百姓官健有歸順者便準敕優恤必令全活旣而召見元卿遽奏請借度支錢及言事頗多不合旨宰相裴度亦以諸將討賊三年功成在旦暮如更分土地與元卿卽恐相侵生事故罷前命而改授焉

是歲旣平淮西元卿奏曰淮西甚有寶貨及犀帶臣知之往取必得上曰朕本討賊爲人除害今賊平人安則我求之得矣寶貨犀帶非所求也勿復此言是月詔授左金吾衛將軍未幾改汾州刺史復徵爲左金吾衛將軍長慶初易置鎮魏守臣元卿詣宰相深陳利害并具表其事後穆宗感悟賜白玉帶旋授檢校左散騎常侍涇州刺史涇原渭節度觀察等使兼充四鎮北庭行軍元卿乃奏置屯田五千頃每屯築牆高數仞鍵閉牢密卒然寇至盡可保守加檢校工部尚書營田成復加使號居六年涇人論奏爲立德政碑移授懷州刺史充河

陽三城節度觀察等使

何進滔亂魏博元卿請自齋大三月糧舉軍出討文宗嘉美

和五年就加檢校司空進階光祿大夫以其營田納粟

二十萬石以裨經費故也是歲改授汴宋毫觀察等使

凡所廢置皆有宏益詔並從之

大和七年

年七十寢疾歸洛

陽詔授太子太保是歲八月卒廢朝三日贈司徒元卿

始以毀家效順累授方鎮然性險巧所至好聚歛善結

交涇人得情亦由此也子延宗開成中爲磁州刺史坐

謀逐河陽節度使以自立爲其黨所告臺司推鞠得實

誅之

詔以元卿嘗毀家歸忠全其宗杖死延宗於京兆府賜還田產

牛元翼趙州人材果而謀王承宗時倚其計爲強雄與

傅良弼二人冠諸將王庭湊叛穆宗以元翼在成德名
出庭湊遠甚自深州刺史擢爲深冀節度使以攜其軍
庭湊怒遣部將王位以銳兵攻元翼不勝乃合朱克融
共圍之詔進元翼成德軍節度使以宣武兵五百進援
元翼固守長慶二年詔赦庭湊罪徙元翼山南東道以
深州賜庭湊使中人促元翼南庭湊恨之已受詔兵不
解招討使裴度詒書請讓克融解而歸庭湊退舍詔並
加檢校工部尚書兩悅之淹月元翼率十餘騎冒圍跳
德棣朝京師庭湊入盡殺元翼親將臧平等百八十人
元翼見延英資問優縟命中人楊再昌取其家并迎田

宏正喪庭湊辭以宏正殞亡所在元翼家須秋遣魏博節度使史憲誠遣其弟入趙四返說庭湊曰田公非得罪於趙尸尚何惜元翼去深州乃一孤將何利其家庭湊乃歸宏正喪於京師元翼聞平等死憤恚卒悉還所賜於朝庭湊遂夷其家良弼字安道清河人以射冠軍中初瀛之博野樂壽介范陽成德間每兵交先薄二城故常爲劇屯德宗以王武俊破朱滔功皆隸成德故以良弼守樂壽李寰守博野庭湊之叛兩賊交誘之而堅壁爲國固守有詔以樂壽爲左神策行營拜良弼爲都知兵馬使寰所領士隸右神策號忻州營亦以寰爲都

知兵馬使賜第京師俄以良弼爲沂州刺史良弼率衆出戰力乃得去寰引兵三千趨忻州庭湊邀之寰斬三百級追者不敢前天子以良弼寰忠有狀乃更賜奴婢服馬召良弼爲左神策軍將軍寶厯初擢夏綏銀節度使異時蕃帳亡命來者必償馬乃與良弼至皆執付其部酋種歡懷終橫海節度使寰擢累保義軍節度使王智興討李同捷未克而烏重胤卒謂寰可共立功請諸朝乃授橫海節度使師所過暴鈔至屯按軍不進遂身入朝盛陳賊勢請濟師欲大調發羣臣議寰兵太重且盜滄景未決而棣州平寰內媿不自安願留京師遂罷

保義軍忻州營更授夏綏銀宥節度使卒寰再易鎮治
無可言者然庭湊之亂聯軍十五萬無成功賊鋒不可
嬰而樂壽博野截然峙中者累歲梗其吞暴議者以爲
難敬宗世寰圖其事上之

劉悟正臣之孫也正臣本名客奴天寶末祿山叛平盧
軍節度使呂知晦受賊僞署客奴時職居牙門襲殺知
晦馳章以聞授平盧軍節度使賜名正臣悟少有勇力

叔父全諒節度宣武器其敢殺署牙將以罪叔逸準爲

奔潞州王虔休復署爲牙將被病去歸東都

從惡

汴帥積緒錢數百萬於洛中悟輒破扃鑰悉盜用之
少年殺人屠狗豪橫犯法繫既而懼亡歸李師古
河南獄留守韋夏卿貸免李師古厚

幣迎之

始亦未甚知後因擊毬馳突衝師古馬仆師古怒

將斬之悟猛以氣語押觸師古師古奇而免之因令管

壯士將後軍

妻以從妹

累署牙門右職奏授淄青節度都知

兵馬使兼監察御史

師道以軍用屈率賈人錢為助命悟督之悟獨寬假人皆歸順

元

和末憲宗既平淮西下詔誅師道師道遣悟將兵拒魏

博軍

悟將兵屯曹法一而信士卒樂為用軍中刁斗不鳴田宏正兵屯陽穀悟徙營潭趙魏師踰河取盧

縣壁阿井城中飛語以謂馮利涉與悟當為帥師道內

疑數召悟計事悟曰今與魏如角力者勢已交先退者

負悟還魏踵薄城下矣左右諫曰兵成敗未可知殺

大將孰肯為用師道然之或言悟且亂不如速去而

數促悟戰悟未及進馳使召之

師道遣使兩輩來督戰密語其副張暹使斬悟

使者與暹屏語移時悟疑之

悟度使來必殺已乃僞疾不出令都虞

候往迎之使者亦果以誠告其人云奉命殺悟以代悟
都虞候卽時先還悟劾之得其實乃召諸將與謀曰魏
博田宏正兵強出戰必敗不出則死今天子所誅者司
空一人而已悟與公等皆爲所驅迫使就其死何如殺
其來使整戈以取鄆立大功轉危亡爲富貴邪衆咸曰
善唯都將所命悟於是立斬其使以兵取鄆別將趙垂
棘沮其行
悟因殺之并殺所惡三十人尸帳前衆畏伏下令曰入
鄆人賞錢十萬聽復私怨財蓄恣取之唯完軍帑違者
斬因遣報宏正使進兵潭趙圍其內城兼以火攻其門
悟夜半薄西門黎明啟而入大將魏銑並斬其首以獻擢
不數刻擒師道并男二人等數十人並斬其首以獻擢
拜悟檢校工部尚書兼御史大夫義成軍節度使封彭

城郡王仍賜實封五百戶錢二萬貫莊宅各一區十五年正月入覲又加檢校兵部尚書餘如故穆宗卽位以恩例遷檢校尚書右僕射是歲十月移鎮澤潞旋以本官兼平章事長慶元年幽州大將朱克融叛囚其帥張宏靖朝廷求名將以鎮漁陽乃加悟檢校司空平章事充盧龍軍節度使至邢州會王庭湊之亂不得人還屯悟以幽州方亂未克進討請授之節鉞徐圖之乃復以悟爲澤潞節度拜檢校司徒兼太子太傅依前平章事進兼幽鎮招討使治邢州圍臨城觀望久不拔時監軍劉承偕頗恃恩權常對衆辱悟又縱其下亂法悟不能平承偕與都將張問謀縛悟送京師以問代節度事悟知之異日有中

使至承偕宴之請悟悟欲往左右皆曰往則必爲其困

辱矣軍衆因亂悟不止之以兵圍監軍乃擒承偕至牙門殺

其二僕欲并害承偕悟救之獲免其屬賈直言質責悟曰李司空死有知使

公所爲至此軍中將復有如公者矣悟遽謝曰吾不欲聞李司空字少選當定卽擒兵退匿承偕囚之朝

廷不獲已貶承偕自是悟頗縱恣欲效河朔三鎮朝廷

失意不逞之徒多投寄潞州以求援往往奏章論事辭

旨不遜寶厯元年九月卒巫者妄言師道以兵屯瑠璃陂悟惶恐命禱祭具千人膳

自往求哀將易衣嘔血數斗卒贈太尉遺表請以其子從諫繼續戎事

從諫母微賤少狡獪師道時使悟出屯署從諫門下別奏從諫與師道諸奴日戲博交通具知其陰密事悉疏

於悟故悟得立功敬宗下大臣議僕射李絳以澤潞內地與三

鎮事理不同不可許

終奏言悟匿死衆不必同亂從諫威惠未著若詔北鎮大將領節度

馳入軍竿其未備使軍情有屬謀自屈宰相李逢吉中

尉王守澄受其賂曲爲奏請

敬宗乃以晉王爲節度大使詔從諫主留事從

諫自將作監主簿起復雲麾將軍守金吾衛大將軍同

正檢校左散騎常侍兼御史大夫充昭義節度副大使

知節度觀察等留後

晉王帝所愛從諫饋獻相望

二年加金吾上將

軍檢校工部尚書充昭義節度等使文宗卽位進檢校

司空

大和初李聽敗館陶走淺口從諫引鐵騎黃頭郎救之聽免進檢校尚書左僕射拜司空封沛國公

昭義自悟時治邢州兩人思上黨從諫還治潞六年十

二月入覲七年春歸藩加同平章事

公卿多託以私又見事柄不一遂心

輕朝廷有驕色李
訓約從諫誅鄭注

九年李訓事敗宰相王涯等四人被

禍時涯兼掌邦計雖不與李訓同謀然不自異於其間

既死非其罪從諫素德涯之私恩心頗不平四

新書上
作三

上

章請涯等罪名仇士良輩深憚之是時中官頗橫天子
不能制朝臣日憂陷族賴從諫論列而鄭覃李石方能
粗秉朝政先是有蕭洪者詐稱太后弟因仇士良保任
許之厚賂及洪累授方鎮納賂不滿士良之志士良怒
遣人上書論洪非太后之親又以蕭本者爲太后弟從
諫深知內官之故乃自潞府飛章論之曰臣聞造僞以
亂真者匹夫知之尚不可況天下皆知乎執疎以爲親

者在匹夫之家尚不可況處大國之朝乎臣受國恩深
奉公心切知有此失安得不言伏惟皇帝陛下仁及萬
方孝敦九族而推心無黨惟理是求微臣所以不避直
言切論深事伏見金吾將軍蕭本稱是太后親弟受此
官榮今喧然國都殆聞藩府自上及下異口同音皆言
蕭宏是真蕭本是僞臣傍聽衆論遍察羣情咸思發明
以正名分今年二月其蕭宏投臣當道求臣上聞自言
比者福建觀察使唐扶及監軍劉行立具審根源已曾
論奏其時屬蕭本得爲外戚來自左軍臺司旣不敢研
窮聖意遂勒還鄉里自茲議論轉益沸騰臣亦令潛問

左軍樞論大體而士良推至公之道發不黨之言蓋蕭
本自度孤危妄有憑恃伏以名居國舅位列朝班而真
僞不分中外所恥切慮皇太后受此罔惑已有恩情若
含垢於一時終取笑於千古伏乞追蕭宏赴闕與蕭本
對推細詰根源必辨真僞詔令三司使推按帝以二蕭
雖詐託名太后之宗不欲誅之俱流嶺表從諫進位檢
校司徒仇士良積怒倡言從諫志窺伺從諫亦妄言請
君側因與朝廷猜貳武宗立兼太子太師性奢
侈飾居室輿馬無遠畧善貿易之算徙長子道入滌歲
推馬征商人又熬鹽貨銅鐵收緝十萬賈人子獻口馬
金幣卽署牙將使行賈州縣所在暴橫吝貪責子貨錢
吏不應命卽愬於從諫欲論奏或遣客游刺故天下怨
怒從諫畜馬高九尺獻之帝帝不納疑士良所沮怒殺
馬益不平又聞士良寵方渥愈憂惑欲自入朝恐不脫

禍因會昌三年卒年四十一贈太傅初大將李萬江者

帳從至潞州牧津梁寺地美水草馬如鴨而健世所謂

津梁種者歲入馬價數百萬子弟姻婭隸軍者四十八

人從諫徙山東懼其重遷且生變而子弟亦豪縱少從

諫不甚禮因誣其叛夷三族凡三百餘家姬妾有微過

輒殺之人皆大將郭誼等匿喪用其姪稹權領軍務稹

知其將亡

從素仕右驍衛將軍從諫以為嗣病甚與妻裴謀令主

軍事置大將王協郭誼劉武德劉守義等佐稹祕不發

喪協謀遣將姜岑請醫於朝中人與醫至時從諫死已

再旬稹曰公困革不任受詔稹請代拜中人曰臥而視

可也辭以母夫人侍不可屏中人欲直入武德等戶之

中人恐有變趨出貺饋百萬後使者繼往為知從諫已

死者未至數舍衆懼武德與將董可武出兵萬人迎勞

至牙門不得前諸將乃詣監軍崔士康邀說請如河朔

故事士康懦不敢拒乃至喪次扶出稹為裹紼巾曰母

更欲殺敕使諸將哄然笑遂出見三軍帝怒前使者不

入謫隸恭陵稹所遣姜岑梁叔文梁叔明三輩皆杖死

京兆府詔從素書敕稹護喪還東都稹不奉詔詔羣臣

議時宰相李德裕用事素惡從諫之姦回奏請劉稹護

喪歸洛以聽朝旨德裕言稹所恃者河朔耳若遣大稹臣諭上旨出山東兵破之必矣

竟叛德裕用中丞李回奉使河朔說令三鎮加兵討稹

乃削奪稹官命徐許滑孟魏鎮幽并八鎮之師四面進

攻於是河陽王茂元以兵屯萬善河東劉沔守昂車關壁榆社魏博何宏敬柵肥鄉侵平恩成德王元逵次

別遣將營天井關為賊將薛茂卿所破執四將火十七

柵張巨進攻萬善不能下茂元欲走會日暮賊自潰去

詔忠武王宰以本軍入懷澤行營陳許士驃武賊衆素

憚畏而茂卿負戰勝冀厚賞或言其兵犯王畧深朝廷

且怒節益不可至稹然之故茂卿失望乃與宰通即偽

挑戰亟北委天井關去左右七營皆潰茂卿奔澤州使

謀言於宰曰澤可取吾應於內宰疑不進失期茂卿扼

腕悵恨稹聞其貳召誅之宰進破劉公直拔陵川劉沔

又取石會關李石代沔領河東稹因石兄洺州刺史恬

移書乞降石以聞右拾遺崔碣表請納之帝怒斥碣鄧
城令詔敢言罷兵者戮賊境上今石答書許稹面縛石
馳往受之稹不出俄而太原將楊弁逐李石與稹連和
稹諸將建議我求承襲彼叛卒若與之是與反者械其
使送京師使康良佐屯鼓腰嶺敗
太原兵生禽卒七百帝猶不赦
京師始從諫將死命稹無咎辱羣奴故李士貴等與王
山積而協請稅商人使劉溪等分出檢實而溪并齊民
閔其貲十取二百姓始怨從諫妻弟裴問守邢州有募
兵五百號夜飛將多豪姓子其家以輸貲不時爲溪所
囚問以爲言溪大怒問因殺溪與刺史崔嘏斬大將自
歸成德軍王釗守洺州給士幣布一端稹檄代歲廩釗
謂衆曰庫物尚多欲發以爲賞可乎士皆喜悉所有給
之送款魏博軍磁州將高玉堯山將魏元談等以次降
成德元逵以久爲賊守殺之稹聞三州降大懼大將郭
誼與王協始議圖稹使董可武誘稹至北第置酒飲酣
卽斬首悉取從諫圖稹使董可武誘稹至北第置酒飲酣
等殺之誅張谷張沿陳揚庭李仲京王渥王羽韓茂章
茂實賈庠郭台甄戈十一族夷之軍中素不附者皆殺

函稹首送王宰獻京師告廟社帝御興安門受之劉公
直亦降於宰石雄以兵守境軍大掠誼移書責之雄銜
怒稹之死誼斥從諫妻伏夾室收其貲私於已建大旆
日望旌節宰相德裕建言稹庸下亂由誼始及軍窮蹙
乃圖稹邀榮不誅無以懲姦臣及兵在境宜悉取逆黨
送京師論如法先是有人呼於潞市曰石雄七千人
至矣從諫捕誅之乃請詔雄率兵如數以入雄至潞縛
誼及王協劉公直安全慶李道德李佐堯劉武德董可
武等送京師並殊死杖崔士康殺之白惟信者潞梟將
數與雄戰懼不敢降自武鄉殺都將康良佺欲降盧鈞
雄遣人召降惟信殺之卒降鈞有詔從諫且死乃署稹
軍事宜剖棺暴尸於市三日雄發視面如生一日尚開
雄三斬之仇人剔其骨幾盡誼者兗州人兄岌事悟爲
牙將常樂淫山秀峻曰我死必葬此望氣者言其地當
三世爲都頭異姓河北謂都頭異姓至貴稱也然寥過
二丈不利誼以岌假刺史穿三丈得石蛇并三卵工破
之皆流血至是誼及岌三子同誅張谷張沿陳揚庭皆
有文時言古今成敗以佐從諫故善遇此三人谷納
邯鄲人李嚴女爲侍人號新聲當從諫潛圖窺脅新聲
諫谷曰始天子以從諫爲節度非有戰野攻城之功直

以其父挈齊十三州還天子去就間未能奪其嗣耳自
有澤潞未間以一縷一蹄爲天子壽左右皆無賴章武
朝數鎮顛覆皆雄才傑器尚不能固天子恩況從諫擢
自兒女手中苟不以法得亦宜以不法終君當脫族西
去大丈夫勿顧一飯恩以骨肉腥健兒食言訖悲涕谷
不決者三月畏言泄縊之李仲京訓之兄爲蕭洪府判
官擢監察御史王渥播之子王羽涯族孫韓茂章茂實
約之子賈庠餽子郭台行餘子甘露難作皆羸服奔從
諫衣食之甄戈者頗任俠從諫厚給卹坐座上謁留
卿從諫與定州戍將有嫌命戈取之因爲逆旅上謁留
飲三日乘間斬其首他日又使取仇人乃引
不逞者十餘輩劫之從諫不悅號僞荆卿

從諫妻裴

氏初稹拒命裴氏召集大將妻同宴以酒爲壽泣下不
能已諸婦請命裴曰新婦各與汝夫文字勿忘先相公
之拔擢莫效李丕背恩走投國家子母爲託故悲不能
已也諸婦亦泣下故潞將叛志益堅稹死裴亦以此極

刑從諫妻裴以弟立功詔欲貸其死刑部侍郎劉三復
悟奇之故爲從練納其女裴年十五火光起往下家人
以爲怪因許婚封燕國夫人寬厚有謀每勸從諫入朝
爲子孫計從諫有妾韋願封夫人許之詔至裴怒毀詔
不與從諫他日會裴黨復出詔裴抵去曰淄青李師古
四世阻命不聞側室封者君承朝廷姑息宜自黜削求
洗濯欲以婢爲夫人族不日滅耳從諫赧然止及韋至
京師乃言李丕降裴會大將妻號哭曰爲我語若夫勿
忘先公恩願以子母託諸婦亦泣下故潞諸將叛益堅
由是公恩願以子母託諸婦亦泣下故潞諸將叛益堅
及禍**稹族屬昆仲九人皆誅**初術者李琢能言禍福從
昌初謂從諫曰往歲長星經斗公生直之今鎮復至當
有災從諫卽徙軍山東開毬塲鑿柳泉大興役以厭及
病有言琢所興造皆逆歲疑有異謀使稹數其罪殺之
府中恟恟俄而李丕降有李佐之者兼孫也累調河南
尉號強直嘗客潞爲從諫所禮留不得去遂署觀察府
支使因娶其從祖妹從諫薄疎屬資賸寒闕佐之亦薄
之不甚答從諫病佐之力諷使還東都從諫雖不能從
然感服其言病且革王協等恐佐之妻母有所關說卽

輦母歸東都會佐之奴告佐之交通賓客漏軍中虛實
以積囚之妻訴不見禮積遂殺之武鄉令唐漢賓儉裔孫
子始悟辟致幕府見從諫稍恣橫假言求長生術不與
事從諫使歸東都師晦懼爲谷揚庭等所譖請居涉從
諫不之疑積敗有爲帝言者擢伊闕令而贈薛茂卿博
州刺史大中初又贈漢賓本縣令先時河北諸將死皆
先遣使弔祭次冊贈次近臣宣慰度軍便宜乃與節軍
中不許出乃用兵大抵不半歲不能定故警將逆子皆
得爲之備積初不意帝怒卽見討及茂元錄詔示積舉
族號慟欲自歸而愚懦不決云自悟至積三世凡二十
六年李丕者善長短術與從諫厚善署大將及積阻命
軍中疾其才丕懼亡爲游奕深入以圖營壁處遂自歸
議者疑爲賊遣德裕奏言討賊半年始有降者當賞以
勸餘帝召見擢忻州刺史丕請取榆社東徑武安入討
賊雖刑洛未下而兵不得救潞不聽楊弁亂遣人誘丕
不斬之以兵扼走集德裕言於帝曰度支戶部物積代
州令丕塞其路賊破矣乃趣丕討弁兵未至而弁已禽
遷汾晉二州刺史大中初拜振武節度
使檢校刑部尚書党項叛徙鄜坊卒

劉沔

字子汪徐州彭城人

許州牙將也

父廷珍以羽林軍扈德宗奉天以戰功官左驍衛大

將軍東陽郡王

少事李光顏為帳中親將

沔少孤客振武節度使范希朝署牙將軍

中大會沔提刀立堂下希朝奇之召謂日後日必處吾坐希朝卒入為神策將

元和末光顏討

吳元濟常用沔為前鋒蔡將有董重質者守洞曲其部

下乘騾即戰號騾子軍最為勁悍官軍常警備之沔驍

銳善騎射每與騾軍接戰必冒刃陷堅俘馘而還故忠

武一軍破賊第一淮蔡平隨光顏入朝憲宗留宿衛歷

三將軍歷鹽州刺史天德軍防禦使在西北邊累立奇

効大和末河西党項羌叛沔以天德之師屢誅其酋渠

移授振武節度使檢校右散騎常侍單于大都護開成

中党項雜虜大擾河西沔率吐渾契苾沙陀三部落等

諸族萬人馬三千騎徑至銀夏討襲大破之俘獲萬計

頒所獲馬羊於戰卒築都護府西北四壘告捷而還以功加檢校戶部尚書

會昌初迴紇部饑烏介可汗奉太和公主至漠南求食

過杷頭烽犯雲朔北川朝廷以太原重地控扼諸戎乃

移沔河東節度使檢校尚書左僕射太原尹北京留守

回鶻寇天德詔以兵據雲仰關虜引去會昌二年又掠太原振武天子使兵部郎中李拭調兵食因視諸將能

否拭獨稱沔乃拜河東節度招撫回鶻詔與幽州張仲武協力招撫迴鶻

竟破虜寇進屯雁門關虜寇雲州沔擊之斬七裨將敗其衆迎公主還宮以功

進位檢校司空議者恨其薄又進金紫光祿大夫賜一子官虜殘衆走詔沔追北仍錄李靖平

顏利事賜之軍還次代州歸義軍降虜三千使尋改滑
隸食諸道不受詔據淳沱河叛河悉擒誅之

州刺史義成軍節度使四年潞帥劉從諫卒子稹匿喪

擅主留務要求旄鉞武宗怒命忠武節度使王宰徐州

節度使李彥佐等充潞府西南面招撫使遂復授河太

原節度充潞府北面招討使屯榆河與張仲武不協方

徵兵幽州會王宰逗留宰相李德裕表河鎮河陽乃移河爲鄭滑節度使

以滑兵二千壁萬善居宰肘腋下激之俾出軍鎮平進位檢校司徒徙忠武節度使旣而

以疾求歸洛陽授太子太保新書初河爲忠武小校從

李光顏討淮西爲捉生將前後遇賊血戰鋒刃所傷幾

死者數四嘗傷重臥草中月黑不知歸路昏然而睡夢

人授之雙燭曰子方大貴此行無患可持此而還既行
炯然有雙光在前自後破虜危難每行常有此光及罷
鎮後雙光息五年李德裕出鎮罷沔爲太子太保明年
以太子太保

新書太傳

致仕卒

年六十五贈司徒

石雄徐州牙校也王智興之討李同捷以雄爲右廂捉
生兵馬使勇敢善戰氣凌三軍自智興以兵臨賊境率
先收棣州雄先驅渡河前無堅陣徐人伏雄之撫待惡
智興之虐欲逐之而立雄智興以軍在賊境懼其變生
因其立功請授一郡刺史朝廷徵赴京師授壁州刺史
智興尋殺雄之素相善諸將士百餘人仍奏雄搖動軍

情請行誅戮文宗雅知其能惜之乃長流白州徙爲陳州長史

大和中河西党項擾亂選求武士乃召還隸振武劉沔

軍爲裨將累立破羌之功文宗以智興故未甚提擢而

李紳李德裕以崔羣舊將素嘉之會昌初迴鶻寇天德

詔命劉沔爲招撫迴鶻使三年迴鶻大掠雲朔北邊牙

於五原沔以太原之師屯於雲州詔雄爲天德防禦副使兼朔州刺史沔

謂雄曰黠虜離散不足驅除國家以公主之故不欲急

攻今觀其所爲氣凌我輩若稟朝旨或恐依違我輩捍

邊但能除患專之可也公可選驍健乘其不意徑趨虜

帳彼以疾雷之勢不暇枝梧必棄公主亡竄事苟不捷

吾自繼進亦無患也雄受教自選勁騎得沙陀李國昌
三部落兼契苾拓拔雜虜三千騎月暗夜發馬邑徑趨
烏介之牙時虜帳逼振武雄旣入城登堞視其衆寡見
輦車數十從者皆衣朱碧類華人服飾雄令謀者訊之
此何大人虜曰此公主帳也雄諭其人曰國家兵馬欲
取可汗公主至此家國也須謀歸路俟兵合時不得動
帳幕雄乃大率城內牛馬雜畜及大鼓夜穴城爲十餘
門遲明城上立旗幟炬火乃於諸門縱其牛畜鼓譟從
之直犯烏介牙帳炬火燭天鼓譟動地可汗惶駭莫測
率騎而奔雄率勁騎追至殺胡山急擊之斬首萬級生

擒五千羊馬車帳皆委之而去遂迎公主還太原以功
加檢校左散騎常侍豐州刺史兼御史大夫天德防禦
等使雄沈勇徇義臨財甚廉每破賊立功朝廷特有賜
與皆不入私室置於軍門首取一分餘並分給以此軍
士感義皆思奮發累遷檢校左僕射河中尹河中晉絳
節度使案紀雄拜河中在劉稹既平之後俄而昭義劉
非從諫未死之前當從新書在下
從諫卒其子稹擅主軍務朝議問罪令徐帥李彥佐爲
潞府西南面招撫使以雄爲晉絳行營副使助彥佐
以晉州刺史李丕案紀會昌三年九月李彥佐爲澤潞西南面招討
使石雄爲副四年三月以雄爲澤潞西南面招討李
丕爲副是丕爲雄副非爲彥佐副此處闕雄
爲副使文而李丕爲副當在拜行營節度下
時王宰在

萬善柵劉沔在石會相顧未進雄受代之翼日越烏嶺

破賊五砦斬獲千計武宗聞捷大悅謂侍臣曰今之義

而有勇罕有雄之比者就拜行營節度使代彥佐徙河中雄既率先破

賊不旬日王宰收天井關何宏敬王元逵亦收磁沼等

郡先是潞州狂人折腰於市謂人曰石雄七千人至矣

劉從諫捕而誅之及稹危蹙大將郭誼密款請斬稹歸

朝軍中疑其詐雄倡言曰賊稹之叛郭誼爲謀主今請

斬稹卽誼自謀又何疑焉武宗亦以狂人之言詔雄以

七千兵受降雄卽徑馳潞州降誼盡擒其黨與初雄討稹水次

見白鷺謂衆曰使吾射中其目當成功一發如言帝聞下詔褒美賊平進加檢校司空

檢校兵部尚書徙河陽宣宗立徙鎮鳳翔王宰智興之子於雄不足雄以驍

門子弟善禮之然討潞之役雄有始卒之功宰心惡之

及李德裕罷相宰黨排擯雄罷鎮白敏中猥曰黑山天井功所酬已厭拜神

武統既而聞德裕貶發疾而卒

史臣曰古所謂名將者不必蒙輪拔距之材拉虎批熊之力要當以義終始好謀而成而阿跌昆仲稟氣陰山率多令範讓家權於主婦拒美妓於姦臣章武恢復之功義師之效也重脣忠於事上仁於撫下淮蔡之役勲亞光顏殿邦之臣也不可多得王沛之擒僚壻李祐之執賊渠皆因事立功轉禍爲福智則智矣仁者不爲而

劉悟自恃太尤字誤世邀續襲至於赤族報亦晚邪雄汚
負羽邊城聲馳沙漠奉迎貴主摧破昆戎不亦壯乎雄
能感於知己不爲無義美哉

贊曰淮鄆砥平義將輸誠二兇受縛亦其同惡毀義棄
忠必殄爾宗孰稱善將劉沔石雄

唐書卷第二百十二

唐書卷第二百十三

列傳一百一

潘孟陽

父炎從新書增

李脩

王遂

曹華

韋綬

鄭權

盧士攻

韓全義

高霞寓

高瑀

崔戎

子雍從新書增

陸巨

張正甫

子毅夫

毅夫子禕

潘孟陽禮部侍郎炎之子也

父炎大厯末官右庶子爲元載所惡久不遷載誅進

禮部侍郎以病免方劉晏任權炎乃其壻雖書疏報答未嘗却開時稱有古人節晏得罪坐貶澧州司馬時與

疾上道不自言于邵高其介申救不見聽孟陽以父蔭進登博學宏辭科補

南尉累遷殿中侍御史降為司議郎孟陽母劉晏女也公

卿多父友及外祖賓從故得薦用累至兵部郎中德宗

末王紹以恩倖數稱孟陽之材因擢授權知戶部侍郎

年未四十其母謂曰以爾之材而位丞郎使吾憂之順宗即位永貞內禪王

叔文誅杜佑始專判度支請孟陽代叔文為副時憲宗

新即位乃命孟陽巡江淮省財賦仍加鹽鐵轉運副使

且察東南鎮之政理時孟陽以氣豪權重領行從三四

百人所歷鎮府但務遊賞與婦人為夜飲至鹽鐵轉運

院廣納財賄補吏職而已及歸大失人望罷為大理卿

三年出爲華州刺史遷梓州刺史劍南東川節度使與
武元衡有舊元衡作相復召爲戶部侍郎判度支兼京
北五城營田使以和糴使韓重華爲副太府卿王遂與
孟陽不協議以營田非便持之不下孟陽忿憾形於言
二人俱請對上怒不許乃罷孟陽爲左散騎常侍明年
復拜戶部侍郎孟陽氣尚豪俊不拘小節居第頗極華
峻憲宗微行至樂遊原見其宏敞工猶未已問之左右
以孟陽對孟陽懼而罷工作性喜宴公卿朝士多與之
遊時指怒者不一俄以風緩不能行改左散騎常侍元
和十年八月卒贈兵部尚書

諡曰康

憲宗每事求理常發

江淮宣慰使左司郎中鄭敬奉使辭上誠之曰朕宮中
用度一疋已上皆有簿籍唯賑卹貧民無所計筭卿經
明行修今登車傳命宜體吾懷勿學潘孟陽奉使所至
但務酣飲遊山寺而已其爲人主所薄如此

李脩

字脩

不知何許人起於寒賤以莊憲皇后妹婿元和

已來驟階仕進以恩澤至坊州絳州刺史無他才性纖
巧承迎常飾厨傳以奉往來中使及禁軍中尉賓客以
求善譽治民莅事粗有政能上以爲才召拜司農卿遷
京兆尹十年莊憲太后崩脩爲山陵橋道置頓使恃能
惜費每事減損靈駕至灞橋頓從官多不得食及至渭

城北門門壞先是橋道司請改造渭城北門計錢三萬
脩以勞費不從令深鑿軌道以通靈駕掘土既深旁柱
皆懸因而頓壞所不及輶輶車者數步而已初欲壞城
之東北墉以出靈駕中人皆不可乃停駕徹去壞門土
木而後行脩懼誣奏輶輶軸折山陵使李逢吉令御史
封其車軸自陵還奏請免脩官上以用兵務集財賦以
脩前後進奉不之責但罰俸而已逢吉極言其罪乃削
銀青階翼日復賜金紫

新書翼日加賜黃金案脩方以宰相言削銀青階不應翼日反

賜金紫疑當從新書

自此朝廷端士多遭譖毀義士爲之側目時

宿師於野饋運不集浙西重鎮號爲殷阜乃以脩爲潤

州刺史浙西觀察使令設法鳩聚財貨淮西用兵頗賴其賦十四年以病求還京師未朝謁而卒

王遂宰相方慶之孫也

新書方慶孫備之孫

以吏能聞於時尤長

於興利銳於操下法頗嚴酷累遷至鄧州刺史以曉達錢穀入爲太府卿潘孟陽判度支與遂私憾互有爭論遂爲西北供軍使言營田非便與孟陽會議相非各求請對上怒俱不見出遂爲柳州刺史遂親吏韋行素柳季常請課料於兩池務屬遂罷務季常等爲吏所誣各笞四十遂柳州制出左丞呂元膺執奏曰遂以補吏犯贓法當從坐其除官制云清能業官據遂犯狀不宜有

清字柳州大郡出守爲優謹奉還制書上令喻之方行
數年用兵淮西天子藉錢穀吏以集財賦知遂強幹乃
用爲宣州刺史宣歙觀察使淮蔡平王師東討召拜光
祿卿充淄青行營諸軍糧料使以光祿職當祠祭改檢
校左散騎常侍兼御史大夫初師之出也歲計兵食三
百萬石及鄆賊誅遂進羨餘一百萬上以爲能時分師
道所據十二州爲三鎮乃以遂爲沂州刺史沂兗海等
州觀察使遂性狷忿不存大體而軍州民吏久染汙俗
率多獷戾而遂數因公事訾詈將卒曰反虜將卒不勝
其忿牙將王弁乘人心怨怒十四年七月

弁與役人浴於川語曰天

方兩墻且毀等罪耳乃謀亂

遂方宴集弁諫集其徒害遂於席

遂驚匿廁

下執而數其罪殺之

判官張實

新書名敦實

李甫

新書名矩甫

等同遇害及

曹華代遂至鎮盡擒亂黨王弁等誅之

弁自知留事帝以沂海新定畏

青鄆亦搖乃拜弁開州刺史至徐州械送京師斬東市

遂器用不宏僻於聚斂而

非兼撫之才但峻威刑以繩亂俗其所制笞杖率踰常

制遂既死監軍使封其杖進呈上令出示於朝以誠廉

使

曹華宋州楚邱人仕宣武軍爲牙校

縛亂將李迺送關下節度使董晉署

爲牙將後避仇奔東都

貞元末吳少誠叛本軍

留守王翽

以華驍果有

智筭用爲襄城戍將蔡賊攻襄城華屢敗之德宗特賜

旗甲

憲宗初累拜檢校右散騎常侍
召至京師賜矛甲綰錦還屯

元和九年以功授

寧州刺史未行而吳元濟叛朝廷命河陽帥烏重胤討

賊重胤請華爲懷汝節度行營副使前後數十戰大破

賊於青陵城

賊大奔拔
凌雲柵

賊平授棣州刺史封陳留郡王

棣鄰於鄆賊屢侵逼

賊略定滴河華遠逐
賊斬二千級復其縣

華招募羣盜

之勁者補之軍卒分據要路其後賊至皆擊敗之鄆人

不敢北顧

擢橫海節
度副使

及李師道誅分所管十二州爲三

鎮王遂爲沂兗海觀察使編刻不能馭衆爲牙將王弁

所害朝廷遂授華左散騎常侍沂州刺史沂海兗觀察

使華至鎮視事三日宴將吏伏甲士千人於幕下羣校

既集華喻之曰吾受命廉問奉聖旨以鄆州將士分割
三處有道途轉徙之勞今有頒給此州兵稍厚鄆州士
卒處右州兵處左冀易以區別分定並令州兵出外既
出闔門乃謂鄆卒曰天子深知鄆人之勞然前害主帥
者不能免罪甲士自幕中出周環之凡鄆卒千二百人
立斬於庭血流成渠是日門屏之間有赤霧高丈餘久
之方散自是海沂之人重足股慄無敢爲盜者華惡沂
之地褊請移理於堯許之初李正已盜有青鄆十二州
傳襲四世垂五十年人俗頑驚不知禮教華令將吏曰
鄆魯儒者之鄉不宜忘於禮義乃躬禮儒士習俎豆之

容春秋釋奠於孔子廟立學講經儒冠四集出家財贍
給俾成名入仕其往者如歸及鎮州軍亂殺田宏正華
表請以本軍進討就加檢校工部尚書升竟海爲武寧

二字
疑譌

節度賜之節鉞李弁叛於大梁華不俟命赴討弁

方遣兵三千人取宋州華逆擊敗之由是宋毫不從弁

亂弁平以功加檢校尚書右僕射以河朔拒命移華爲

滑州刺史義成軍節度使

盜殺商賈吏捕得乃華嬖
人華怒斷其頭以祭死者

長

慶三年七月卒於鎮時年六十九華雖出自戎行而動

必由禮尤重士大夫未嘗以富貴驕人下追僕隸走使

之徒必待之以誠信人以爲難贈司空

新書贈
左僕射

韋綬字子章京兆

年萬

人少有至性喪父刺血寫佛經初

爲長安縣尉遭朱泚之亂變服乘驢赴奉天

拜華陰令

于頔

鎮襄陽辟爲賓佐嘗因言政面刺頔之縱恣入朝爲工

部員外郎轉屯田郎中元和十年改職方郎中充太子

諸王侍讀再遷諫議大夫時穆宗在東宮方幼好戲綬

講書之隙頗以嘲誚悅之嘗密齎家所造食入宮餉太

子憲宗嘗召對綬奏曰太子學書至依字輒去旁人臣

問之太子云君父以此字可天下奏事臣子不合全書

上益嘉太子之賢賜綬錦綵綬無威儀時以人間鄙說

戲言以取悅太子太子因入侍道綬語憲宗不悅謂侍

臣曰凡侍讀者當以經義輔導太子納之軌物而綬語及此予何望邪乃罷侍讀出爲虔州刺史穆宗卽位以師友之恩召爲尚書右丞兼集賢院學士甚承恩顧出入禁中綬以七月六日是穆宗載誕節請以是日百官詣光順門賀太后然後上皇帝壽時政道頗僻敕出人不敢議久之宰臣奏古無生日稱賀之儀其事終寢綬在集賢遇重陽賜宰臣百官曲江宴綬請與集賢學士別爲一會從之長慶元年三月轉禮部尚書判集賢院事帝嘗問禳災祈福其可必乎綬對曰昔宋景公以一善言而法星退之三舍此禳災以德也漢文帝除祕祝

每於祠祭盡敬而已言無所祈以明福不可以求致也

而二君卒能變已變之災享自致之福著於史傳其理

甚明如失德以祈災消媚神以祈福至神苟有知當因

以致譴非祈禳之道也時人主失德綬因以諷之二年

十月檢校戶部尚書興元尹山南西道節度使辭日請

門戟十二自將赴鎮又訴家貧請賜錢二百萬又面乞

授子元弼官

太常丞

上皆可之綬御事無術洎臨戎鎮庶

政隳紊三年八月卒贈尚書右僕射博士劉端夫請諡

爲通

新書通醜

殿中侍御史孟瑄上言以爲非當博士權安

請諡爲繆

新書繆醜

竟不施行

鄭權滎陽開封人也登進士第釋褐涇原從事節度使
劉昌病亟請入覲度軍情必變以權寬厚容衆俾主留
務及昌上路兵果亂權挺身入白刃中抗辭喻以逆順
因殺其首亂者數人三軍畏伏德宗聞而嘉之時天子
厭兵藩鎮將吏得軍情者多超授官爵自試衛佐擢授
行軍司馬御史中丞入朝爲倉部郎中累遷至河南尹
十一年代李遜爲襄州刺史山南東道節度使十二年
轉華州刺史潼關防禦鎮國軍使十三年遷德州刺史
德棣滄景節度使時朝廷用兵討李師道權以德棣之
兵臨境奏於平原安德二縣之間置歸化縣以集降民

滄州刺史李宗奭與權不協每事多違不稟節制權奏之上令中使追之宗奭諷州兵留已上言懼亂未敢離郡乃以烏重胤鎮橫海代權歸朝滄州將吏懼共逐宗奭宗奭方奔歸京師詔以悖慢之罪斬於獨柳之下其弟宗奭長流汀州授權邠寧節度會天德軍使上章論宗奭之寃爲權誣奏權降授原王傅尋遷右金吾衛大將軍充左街使穆宗卽位改左散騎常侍充入迴鶻告哀使憚其遠役辭以足疾不獲免肩輿而行權器度魁偉有辭辨旣至虜廷與虜主爭論曲直言辭激壯可汗深敬異之長慶元年使還出爲河南尹入拜工部侍郎

遷本曹尚書以家人數多俸入不足求爲鎮守旬月檢校右僕射廣州刺史嶺南節度使初權出鎮有中人之助南海多珍貨權頗積聚以遺之大爲朝士所嗤四年十月卒

盧士攻山東右族以文儒進性端厚與物雅有令聞始爲吏部員外郎稱職轉郎中京兆少尹奉憲宗園寢刑簡事集時論推其有才權知京兆尹事會幽州劉總願釋兵柄入朝請用張宏靖代已復請析瀛莫兩州用士攻爲帥朝廷一皆從之士攻遂授檢校右散騎常侍充瀛莫兩州都防禦觀察使無何幽州亂害賓介繫宏靖

取裨將朱克融領軍務遣兵襲瀛莫朝廷慮防禦之名
不足抗兇逆卽日除士玫檢校工部尚書充瀛莫節度
使士玫亦罄家財助軍用堅拒叛徒者累月竟以官軍
救之不至又瀛莫之卒親愛多在幽州遂爲其下陰導
克融之兵以潰士玫及從事皆被拘執送幽州囚於賓
館及朝廷宥克融之罪士玫方得歸東洛尋拜太子賓
客留司洛中旋除虢州刺史復爲賓客寶曆元年七月
卒贈工部尚書

韓全義出自行間少從禁軍事實文場及文場爲中尉
用全義爲帳中偏將典禁兵在長武城貞元十三年

紀

四年爲神策行營節度長武城使代韓潭爲夏綏銀宥節
度詔以長武兵赴鎮全義貪而無勇短於撫御制未下
軍中知之相與謀曰夏州沙磧之地無耕蠶生業盛夏
移徙吾所不能是夜戍卒鼓譟爲亂全義踰城而免殺
其親將王栖巖趙虔曜等賴都虞候高崇文誅其亂首
而止之全義方獲赴鎮明年吳少誠拒命詔徵十七鎮
之師討之時軍無統帥兵無多少皆以內官監之師之
進退不由主將十五年冬王師爲賊所敗於小澗河德
宗以文場素待全義乃用爲蔡州四面行營招討使仍
以陳許節度使上官浣副之諸鎮之師皆取全義節度

全義將略非所長能以巧佞財賄結中貴人以被薦用
及師臨賊境又制在監軍每議兵出一帳之中中八十
數紛然爭論莫決蔡賊聞之屢求決戰十六年五月遇
賊於潞水南廣利城旗鼓未交諸軍大潰爲賊所乘全
義退保五樓賊對壘相望潰兵未集乃與監軍賈英秀
賈國良等保潞水縣賊距潞水五六里而軍全義懼其
凌突退保陳州其汴宋河北之軍皆亡歸本鎮唯陳許
將孟元陽神策將蘇光榮等數千人守潞水全義誘潞
州大將夏侯仲宣滑將時昂河陽將權文度河中將郭
湘等誅之由是軍情稍固少誠知王師無能爲致書幣

以告監軍願求昭洗德宗召大臣議宰相賈耽曰昨全義五樓退軍賊不追襲者應望國家恩貸臣伏恐須開生路上然之又得監軍等奏卽下制洗滌加其爵秩十七年全義自陳州班師而中人掩其敗迹上待之如初全義武臣不達朝儀託以足疾不任謁見全義司馬崔放人對德宗勞問放引過言招撫無功德宗曰全義爲招討使招得吳少誠歸國其功大矣何必殺人乃爲功邪旋命還鎮令中使就第賜宴錫資頗厚自還至辭都不謁見而去議者以隳敗法制從古已還未如貞元之甚憲宗在藩常惡其事及卽位全義懼求入覲詔以太

哉

子太保致仕其年七月卒

其子獻女樂入人帝不納曰我方以儉治天下惡用是爲

高霞寓范陽人祖仙父栖鶴皆以孝聞凡五代同爨德宗朝採訪使洪經綸奏旌表其門閭鄉里稱美其事霞寓少讀左氏春秋及孫吳兵法好大言頗以節槩自許貞元中徒步造長武城使高崇文待以猶子之分擢授軍職累奏憲宗甚見委信元和初詔授兼御史大夫從崇文將兵擊劉闢連戰皆克下鹿頭城降李文悅仇良輔追戰七盤城有蜀平以功拜彭州刺史尋繼崇文爲長武城使封感義郡王元和五年以左威衛將軍隨吐

突承璀擊王承宗又加左散騎常侍

諸將多覆軍獨霞寓有功詔藏所獲

鎧仗於神策軍以旌之承璀已執盧從史其軍相驚乃遣霞寓諭之麾而大呼曰元惡縛矣公等宜自安卽脫鎧揖而前衆遂定欲留爲帥霞寓間道去明年改豐州刺史三城都團練防

禦使六遷至檢校工部尚書元和十年朝廷討吳元濟

以霞寓宿將乃析山南東道爲兩鎮以霞寓爲唐鄧隨

節度使霞寓雖稱勇敢素昧機略至於統制尤非所長

及達所部乃率兵趣蕭陂與賊決戰旣小勝又進至文

城柵賊軍僞敗而退霞寓逐之不已因爲伏兵所掩王

師大衄霞寓僅以身免坐貶歸州刺史後以恩例徵爲

右衛大將軍十三年出爲振武節度使

吐蕃攻鹽豐二州霞寓以兵五

千屯拂雲堆虜引去後
金河溉鹵地數千頃

入爲左武衛大將軍長慶元年

授邠寧節度使三年就加檢校右僕射四年加檢校司
空又加司徒寶厯二年疽發首不能理事求歸闕下其
夏授右金吾衛大將軍檢校司徒途次奉天而卒年五
十五贈太保霞寓卒伍常材始因宦官進用遂階節將
位望旣高言多不遜朝廷知之欲議移罷霞寓頗懷憂
恐捨私第爲佛寺上言請額爲懷恩用資聖福大率姦
妄兇狡如此又非斥朝列侮慢僚屬鄙辭俚語日聞於
時

高瑀渤海僭人少好論兵釋褐右金吾曹曹累辟諸府

從事歷陳蔡二郡刺史入爲太僕卿大和初忠武節度使王沛卒物議以陳許軍四征有功必自擇帥或以禁軍之將得之宰相裴度韋處厚議瑀深沈方雅曾刺陳蔡人懷良政又熟忠武軍情欲請用瑀事未聞陳許表至果請瑀爲帥乃授檢校左散騎常侍許州刺史忠武節度使自大厯已來節制之除拜多出禁軍中尉凡命一帥必廣輸重賂禁軍將校當爲帥者自無家財必取資於人得鎮之後則膏血疲民以償之及瑀之拜以內外公議搢紳相慶曰韋公作相債帥鮮矣三年就加檢校工部尚書比年水旱人民荐饑瑀召集州民繞郭立

隄塘一百八十里蓄洩既均人無饑年加檢校右僕射
六年移授徐州刺史武寧軍節度使議者以徐泗王智
興之後軍士驕恣宜得雄帥鎮之乃以太府卿崔珙代
瑀徵爲刑部尚書以疾求分司拜太子少傅其月復授
檢校右僕射陳許蔡節度使八年六月卒贈司空瑀性
寬和有體量爲官雖無赫赫之譽所至皆理尤得士心
論者美之

崔戎字可大高伯祖元暉神龍初有大功封博陵郡王
祖嬰郢州刺史父貞固太原榆次尉戎舉兩經登科授
太子校書調判入等授藍田主簿爲藩鎮名公交辟

辟淮

南李鄜府衛次公代鄜憲宗稱戎才故次公倚戎於職

裴度領太原署為參謀時

王承宗據鎮州叛度請戎單車往諭之承宗感泣受教

入為殿中侍御史累拜吏部郎中遷諫議大夫

雲南蠻亂成都

尋為劍南東西兩川宣慰使西川承蠻寇之後戎既宣

撫兼再定征稅

奏罷稅外薑芋錢當賦錢者率三之以其一準繪布優其估以與民緩招流亡

廢置得所公私便之還拜給事中駁奏為當時所稱改

華州刺史

吏以故事置錢萬緡為刺史私用戎不取及去召吏曰籍所置錢享軍吾重矯激以夸後

人遷竟海沂密都團練觀察等使將行州人戀惜遮道

至有解鞵斷轡者

時詔使尚在民泣詣使請白天子句戎還使許諾戎恚責其下眾曰留公

而天子怒不過斬吾二三老人則公不理竟一年

去矣戎夜單騎亡去民追不及乃止 鉏滅

十餘輩

大和八年五月卒

年五十五

贈禮部尚書

子雍字順中由起居

民大喜郎出爲和州刺史龐勛以兵劫烏江雍不能抗遣人持

牛酒勞之密表其狀民不知訴諸朝宰相路巖素不平

因是傳其罪賜死宣州

陸亘字景山吳郡人祖元朗睦州司馬父持詮惠陵臺

令亘以書判授集賢殿正字華原縣尉應制舉授萬年

縣丞自京兆府兵曹參軍拜太常博士寺有禮生孟真

久於其事凡吉凶大儀禮官不能達率訪真真亦賴是

須要姑息元和七年冊皇太子將撰儀注真亦欲參預

亘笞之由是禮儀不專於胥吏自虞部員外郎出爲鄧

州刺史其後入爲戶部郎中祕書少監太常少卿歷刺

堯蔡號蘇四郡遷越州刺史浙東團練觀察等使移宣
歙觀察使加御史大夫大和八年九月卒年七十一贈
禮部尚書亘強明嚴毅所至稱理初赴堯州延英面奏
曰凡節度使握兵分屯屬郡者刺史不能制遂爲一州
之弊宜有處分因詔天下兵分屯屬郡者隸於刺史越
之永嘉郡城於海甯常陷寇境集官吏廩祿之半以代
常賦因循相踵吏返爲倖亘按舉贓罪表請郡守已降
增給其俸人皆賴之

張正甫字踐方南陽人曾祖大禮坊州刺史祖紹貞尚
書右丞父泚蘇州司馬正甫登進士第從樊澤爲襄陽

從事累轉監察御史于頔代澤辟留正甫正甫堅辭之
遂誣奏貶郴州長史後由邕州徵拜殿中侍御史遷戶
部員外郎轉司封員外郎兼侍御史知雜事遷戶部郎
中改河南尹由尚書右丞爲同州刺史入拜左散騎常
侍集賢殿學士判院事轉工部尚書五年檢校兵部尚
書太子詹事明年以吏部尚書致仕正甫仁而端亮涖
官清強居外任所至稱理大和八年九月卒年八十三
累贈太師子毅夫

毅夫登進士第初正甫兄式大厯中進士登第繼之以
正甫式子元夫傑夫徵夫又相次登科大和中文章之

盛世其稱之元夫大和初兵部郎中知制誥遷中書舍人出爲汝州刺史毅夫位至戶部侍郎宏文館學士判院事諸羣從登第者數人而毅夫子禕最知名

禕字冠章釋褐汴州從事戶部判官入爲藍田尉集賢校理趙隱鎮浙西劉鄴鎮淮南皆辟爲賓佐入爲監察御史遷左補闕乾符中詔入翰林爲學士累官至中書舍人黃寇犯京師從僖宗幸蜀拜工部侍郎判戶部事奉使江淮還爲當塗者不協改太子賓客左散騎常侍轉吏部侍郎歷刑部兵部尚書從昭宗在華爲韓建所構貶衡州司馬昭宗還京徵拜禮部尚書太常卿充禮

儀使遷兵部尚書禕苦心爲文老而益壯爲刑部時劉
鄴子覃當巢寇時避禍於金吾將軍張直方之第被害
僖宗還京而惡覃者以託附逆黨死不以義下三司詳
罪禕上章申理言覃父子併命於賊廷豈附逆邪其家
竟獲洗雪覃亦贈官其行義始終皆如此類

史臣曰孟陽王遂儒雅之曹才有可稱竟以財媚時君
陷爲俗吏蹈道之論可不懼邪全義官由妄進霞寓位
以卒升勇毅不足以啓行謀慮不足以應變敗亡之辱
不亦宜乎朝無責帥之刑蓋自恥也權珞長者末塗喪
真雖牽於食貧純則僞矣

贊曰蘊仁則哲蘊利則狂搢紳之肩勿效潘王全義逃
責貞元失策霞寓薄刑元和復興

唐書卷第二百十三

[illegible]

唐書卷第二百十四

列傳三十四

孟簡

胡証子澱

湘

崔元略

子鉉、鉉子沆、元略弟元受、元式

杜元穎

崔宏禮

李虞仲父端

王質

盧簡辭兄簡能、弟宏正、簡求簡能子知猷

孟簡字幾道平昌人天后時同州刺史誡之孫工詩有名擢進士第登宏辭科累官至倉部員外郎戶部侍郎王叔文竊政簡爲子司多不附之叔文惡之雖甚亦不至擯斥宰相韋執誼爲徙他曹尋遷司封郎中元和四年超拜諫議大夫知匭事簡明於內典六年詔與給事中劉伯芻

工部侍郎歸登右補闕蕭俛等同就醴泉佛寺翻譯大

乘本生心地觀經簡最擅其理王承宗叛詔以吐突承

瓘爲招討使簡抗疏論之

韓泰韓晙之復刺史吐突承瓘爲招討使簡皆固爭請延

英言不可狀

坐語訐出爲常州刺史八年就加金紫光祿大

夫簡始到郡開古孟瀆長四十一里灌溉沃壤四千餘

頃爲廉使舉其課績是有就加之命是歲徵拜爲給事

中九年出爲越州刺史兼御史中丞浙東觀察使承李

遜抑遏士族恣縱編戶之後及簡爲政一皆反之而農

估多受其弊當時以爲兩未可也十二年入爲戶部侍

郎

以工部侍郎召還初使府得代詔至署留後卽行李
簡觀察浙西始請留故使交政及簡還半道堂牒還

之如例乃聽
解進戶部
十三年代崔元略爲御史中丞仍兼戶部

侍郎
戶部有二員判使案者別居一署謂之左戶元和後選委華重宰相多由此進崔羣既相而簡代之

故簡意是歲出爲襄州刺史山南東道節度使
內不樂政頗嚴

且柄任
十四年敕於穀城縣置羣牧命曰臨漢監令簡充使

簡奏請均州鄖鄉縣鎮遏使趙潔充本縣令臺司奏有

虧刑典罰一月俸是歲改授太子賓客分司東都十五

年穆宗卽位貶吉州司馬員外置同正員初簡在襄陽

以腹心吏陸翰知上都進奏委以關通中貴翰持簡陰

事漸不可制簡怒追至州以土囊殺之且欲滅口翰子

弟詣闕進狀訴寃且告簡贓狀御史臺按驗獲簡賂吐

突承璀錢帛等其計七千餘貫匹事狀明白故再貶之
長慶元年大赦量移睦州刺史二年移常州刺史三年
入爲太子賓客分司東都其年十二月卒簡性俊拔尚
義早歲交友先歿者視其孤每厚於周卹議者以爲有
前輩風然溺於浮圖之教爲儒曹所誚

胡証字啓中河東人父瑱伯父玫登進士第証貞元中
繼登科咸寧王渾瑊辟爲河中從事自殿中侍御史拜
韶州刺史以母年高不可適遠改授太子舍人襄陽節
度使子頤請爲掌書記檢校祠部員外郎元和四年由
侍御史歷左司員外郎長安縣令戶部郎中田宏正以

魏博內屬請除副貳乃兼御史中丞充魏博節度副使

仍兼左庶子入遷左諫議大夫九年以党項寇邊以証

有安邊才略乃授單于都護御史大夫振武軍節度使

道河中時趙宗儒爲帥以州民入謁里人榮之前任將帥非統馭之才邊事曠

廢朝廷故特用証以鎮十三年徵爲金吾大將軍依前

兼御史大夫十四年充京西京北巡邊使訪其利害以

聞長慶元年大和公主出降迴紇詔以本官檢校工部

尚書充和親使舊制以使車出境有行人私覲之禮官

不能給召富家子納貲於使者而命之官及証將行首

請釐革儉受省費以絕鬻官之門行及漠南虜騎繼至

狠心犬態一日千狀欲以戎服變革華服又欲以王姬
疾驅徑路証抗志不拔守漢儀黜夷法竟不辱君命使
還拜工部侍郎敬宗卽位之初檢校戶部尚書守京兆
尹數月遷左散騎常侍寶厯初拜戶部尚書判度支上
表乞免願効藩服二年檢校兵部尚書廣州刺史充嶺
南節度使大和二年以疾上表求還京師是歲十月卒
於嶺南時年七十一廢朝一日贈左新書僕射廣州有
海舶之利貨貝狎至証善蓄積務華侈厚自奉養童奴
數百於京城修行里起第連亘閭巷嶺表奇貨道塗不
絕京邑推爲富家証素與賈餗善及李訓事敗禁軍利

其財稱証子澥匿餽乃破其家一日之內家財並盡軍人執澥入左軍仇士良命斬之以徇時澥弟湘為太原從事忽白晝見綠衣人無首血流被地入於室湘惡之翼日澥凶問至而湘獲免証膂力絕人晉公裴度未顯時羸服私飲為武士所窘証聞突入坐客上引觥三醵客皆失色因取鐵燈檠摘枝葉櫟合其跗橫膝上謂客曰我欲為酒令飲不醵者以此擊之眾唯唯証一飲輒數升次授客客流離盤桓不能盡証欲擊之諸惡少叩頭請去証悉驅出故時人稱俠其

崔元略博陵人祖渾之父倣新書名敬誤貞元中官至尚書

左丞元略舉進士歷佐使府元和八年拜殿中侍御史十二年遷刑部郎中知臺雜事擢拜御史中丞元和十

三年以李夷簡自西川徵拜御史大夫乃命元略留司東臺尋除京兆少尹知府事仍加金紫數月真拜京兆尹明年改左散騎常侍穆宗卽位命元略使党項宣撫辭疾不行出爲黔中觀察使兼御史中丞初元略受命使党項意宰臣以私憾排斥頗出怨言宰相崔植奏曰比以聖意切在安撫党項乃差元略往使受命之後苦不樂行言辭之間頗乖去就豈有身忝重恩不思報效苟非便已卽不肯行須有薄懲以肅在位請出爲黔中觀察使初崔植任吏部郎中元略任刑部郎中知雜時中丞改京兆尹物議以植有風憲之望元略因入閣妄

稱植失儀命御史彈之時二人皆進擬爲中丞中旨果授元略植深銜之及植爲相元略以左散騎常侍使於党項元略意植之見排辭疾不行被譴出踰年轉鄂州刺史鄂岳都團練觀察使長慶四年入爲大理卿敬宗卽位復爲京兆尹尋兼御史大夫以誤徵畿甸經赦免放緡錢萬七千貫爲侍御史蕭澈彈劾有詔刑部郎中趙元亮大理正元從質侍御史溫造充三司覆理元略有中助止於削兼大夫初元略有宰相望及是事望益減寶祿元年遷戶部侍郎議者以元略版圖之拜出於宣授時諫官有疏指言內常侍崔潭峻方有權寵元略

以諸父事之故雖被彈劾而遽遷顯要元略亦上章自辨且曰一昨府縣條疏臺司舉劾孤立無黨謗言益彰不謂詔出宸衷恩延望外處南宮之重位列左戶之清班豈臣庸虛敢自干冒天心所擇雖驚特進之恩衆口相非乃致因緣之說詔答之曰朕所命官豈非公選卿能稱職奚恤人言然元略終不能逃父事潭峻之名竇厯二年四月京兆府以元略前任尹日爲橋道使造東渭橋時被本典鄭位判官鄭復虛長物價擡估給用不還人工價直率斂工匠破用計贓二萬一千七百九貫敕云元略不能檢下有涉慢官罰一月俸料時劉栖楚

自爲京兆尹有覬覦相位之意元略方在次對又多遊
裴度門栖楚恐礙已以計摧之乃按舉山陵時錢物以
汚之大和三年轉戶部尚書四年判度支五年紀四檢
校吏部尚書出爲東都留守畿汝等防禦使是歲又遷
滑州刺史義成軍節度使十二月卒廢朝三日贈尚書
左僕射子鉉

鉉字台碩登進士第三辟諸侯府荆南西蜀掌書記從李

石荆南
爲賓佐

會昌初入爲左拾遺再遷

司勳

員外郎知制誥召

入翰林充學士

遷中書
舍人

累遷戶部侍郎承旨

武宗好蹴
鞠角抵鉉

切諫帝
褒納之

會昌末

三

以本官

拜中書
侍郎

同平章事

鉉入朝凡
三歲至宰

相而石猶在江陵澤
謫平兼戶部尚書

為同列李德裕所嫉罷相為陝虢

觀察使檢校刑部尚書宣宗卽位遷檢校兵部尚書河

中尹博陵縣開國子食邑五百戶大中三年召拜御史

大夫尋加正議大夫中書侍郎同平章事累遷金紫光

祿大夫守左僕射門下侍郎太清宮使宏文館大學士

博陵縣

新書作郡

開國公食邑至二千戶七年與館中學士

崔瑒薛逢等撰續會要四十卷獻之

鉉所善鄭魯楊紹復段瓌薛蒙頗參

議論時語曰鄭楊段薛炙手可熱欲得命通魯紹瓌蒙

帝聞之題於展是時魯為刑部侍郎鉉欲引以相帝不

許用為河南尹他日帝語鉉曰九年檢校司徒揚州大
魯去矣事由卿否鉉惶懼謝罪

都督府長史進封魏國公淮南節度使宣宗於太液臺

賦詩宴餞有七載秉鈞調四序之句儒者榮之時宣州軍亂逐

觀察使鄭薰鉉出兵討擊詔兼宣歙池觀察使既平加檢校司空罷兼使居九年條教一下無復改民以順賴

咸通初移鎮襄陽八年徐州戍將龐勛自桂管擅還道塗剽掠鉉時為荆南節度聞徐州軍至湖南盡率州兵點募丁壯分扼江湘要害欲盡擒之徐寇聞之踰嶺自江西淮右北渡朝議壯之卒於江陵子沆汀潭沂

沆

字內融

登進士第官至員外郎知制誥拜中書舍人坐

事貶循州司戶

業保衡逐于琮沆亦貶循州司戶參軍僖宗立召為永州刺史案本紀沆坐崔

臧裕貶非緣于琮也誤

乾符初復拜舍人尋遷禮部侍郎典貢舉

選名士十數人多至卿相乾符末

五年

本官同平章事以

部侍郎同中書門下平章事昕旦告麻大霧塞廷中百
條就班修慶大風雨雹時謂不祥俄改中書侍郎兼工
部尚書時王景崇進兼中書令讓其兄景儒求易定節
度沆謂魏博盧龍且相援執不可盡攜專政而黃巢勢
浸盛沆每建裁遇京國盜據從駕不及而卒第遇害
沂後官亦隆顯

元略弟元受元式元儒元受登進士第高陵尉直史館
元和初于臯謨爲河北行營糧料使元受與韋岵薛翼
王湘等皆爲臯謨判官分督供饋旣罷兵或以臯謨隱
沒賊罪除名賜死元受從坐皆逐嶺表竟坎塲不達而
卒子鈞鉶銖相繼登進士第辟諸侯府

元式

始署帥府僚佐累
官湖南觀察使

會昌三年

紀四

檢校左散騎常

侍河中尹河中晉絳觀察使四年檢校禮部尚書太原

尹北都留守河東節度使六年入爲刑部尚書宣宗朝

領度支以本官

拜門下侍郎

同平章事

進兼戶部尚書以疾罷卒贈司空謚曰莊

元儒元和五年登進士第元式子錯仕至京兆尹

杜元穎萊公如晦裔孫也父佐官卑元穎貞元末進士

登第

又擢宏詞

再辟使府元和中爲左拾遺右補闕召入翰

林充學士手筆敏速憲宗稱之吳元濟平以書詔之勤

賜緋魚袋轉司勳員外郎知制誥穆宗卽位召對思政

殿賜金紫超拜中書舍人其年冬拜戶部侍郎承旨長

慶元年三月以本官同平章事加上柱國建安男元穎

自穆宗登極自補闕至侍郎不周歲居輔相之地辭臣速達未有如元穎之比也三年冬帶平章事出鎮蜀川穆宗御安福門臨餞昭愍卽位童心多僻務爲奢侈而元穎求蜀中珍異玩好之具貢奉相繼以固恩寵以故箕斂刻削工作無虛日軍民嗟怨流聞於朝大和三年南詔蠻攻陷戎嚮等州徑犯成都兵及城下一無備擬方率左右固牙城而已蠻兵大掠蜀城玉帛子女工巧之具而去是時蠻三道而來東道攻梓州郭釗禦之而退時元穎幾陷賴郭釗擊敗其衆方還蠻驅蜀人至大渡河謂之曰此南吾境放爾哭別鄉國數萬士女一時

慟哭風日爲之慘悽哭已赴水而死者千餘怨毒之聲
累年不息蠻首領箠顛遣人上表曰蠻軍比修職貢遽
敢侵邊但杜元穎不恤三軍令入蠻疆作賊移文報彼
都不見信故蜀部軍人繼爲鄉導蓋蜀人怨苦之深祈
我此行誅虐帥也誅之不遂無以慰蜀士之心願陛下
誅之監軍小使張士謙至備言元穎之咎貶邵州刺史
議者不厭
坐貶循州司馬判官崔璜連州司馬紇干泉郢州長史
盧并唐州司馬皆以佐元穎無狀也六年卒於貶所六年
十臨終上表乞贈官贈湖州一本作刺史元穎與李德裕
善會昌初
德裕當國因元穎弟元絳位終太子賓客元絳子審權
赦令復其官

位至宰相自有傳

崔宏禮字從周博陵人北齊懷遠之七代孫祖育常州

江陰令父孚湖州長城令宏禮風貌魁偉磊落有大志

過宣武從劉元佐獵夷門元佐酒酣顧曰崔生獨不知

此樂邪宏禮笑曰我固喜武請爲公歡元佐臂鷹與宏

禮馳逐急緩在手一軍驚曰安得此奇客元佐大悅欲

留之固辭厚爲資餉至京師所善李觀病且死宏禮殯

葬爲治喪舉進士平判異等靈武李樂表累佐藩府官

至侍御史元和中呂元膺爲東都留守以宏禮爲從事

時淮西吳少陽初死吳元濟阻兵拒命山東反側之徒

爲之影援東結李師道謀襲東洛以脅朝廷宏禮爲元

膺籌畫部分兵衆以固東都卒亦無患還留守累除汾

州棣州

新書忻汾二州

刺史會田宏正請入覲請副使乃授宏

禮衛州刺史充魏博節度副使

伐李師道宏正多所咨逮還魏博又表為相州

刺歷鄭州刺史長慶元年劉總入覲張宏靖移鎮范陽

復加宏禮檢校左散騎常侍充幽州盧龍軍節度副使

未及境幽鎮兵亂改為絳州刺史明年汴州李汭反急

詔追宏禮為河南尹兼御史大夫東都畿汝都防禦副

使汭平遷河陽節度使整練戈矛頗壯戎備又上言請

於秦渠下闢荒田三百頃歲收粟二萬斛

新書八萬斛疑誤

詔

皆從之以疾連表請代數歲拜檢校戶部尚書華州刺

史會天平軍節度使烏重胤卒朝廷難其人復以宏禮

爲天平軍節度使仍詔卽日乘遞赴鎮

李同捷拔與李聽合師討之至

濮州大將李萬瑀劉宋擁兵自固宏禮表萬瑀守沂州

宋守黃州奪其兵擊賊禹城破之獲鎧裝數十萬時徐

泗節度使王智興檄兗海鄆曹淄青當徐道者出車五

千乘轉粟饋軍宏禮度道遠乃自兗開育山故渠自黃

隊抵青邱師人大濟李祐以鄭滑兵三千入濟而潰宏

禮悉斬之爲出鄆兵二千祐遂大破賊尸藉十餘里祐

望鄆拜曰活我者崔公也文宗卽位就加檢校左僕射理鄆三載改

授東都留守仍遷刑部尚書詔赴闕以疾未至大和四

年十月復除留守是歲十二月卒年六十四

新書大贈

司空宏禮少時專以倜儻意氣自任通涉兵書留心軍

旅之要用此累更選用歷踐藩鎮所居無可尚之績雖

終完有素然善治生蓄積物議少之

李虞仲字見之趙郡人祖震大理丞父端登進士第工詩大庠中與韓翃錢起盧綸等文詠唱和馳名都下號大庠十才子時郭尚父少子曖尚代宗女昇平公主賢明有才思尤喜詩人而端等十人多在曖之門下每宴集賦詩公主坐視簾中詩之美者賞百縑曖因拜官會十子曰詩先成者賞時端先獻警句云薰香荀令偏憐小傅粉何郎不解愁主卽以百縑賞之錢起曰李校書誠有才此篇宿構也願賦一韻正之請以起姓爲韻端卽褻牋而獻曰方塘似鏡草芊芊初月如鉤未上弦新開金埒教調馬舊賜銅山許鑄錢曖曰此愈工也起等

始服端自校書郎移疾江南授杭州司馬而卒虞仲亦

工詩元和初登進士第又以制策登科授宏文館校書

從事荆南入爲太常博士

建言諡者所以表德懲惡春秋褒貶法也茅土爵祿僇辱

流放皆緣一時非以明示百代然而後之所以知其行者惟諡是觀古者將葬請諡今近或二三年遠乃數十

年然後請諡人沒已久風績湮歇採諸傳聞不可考信

謀狀雖在言與事浮臣請凡得諡者前葬一月請考功

刺太常定議其不請與請而過時者聽御史劾舉居京

師不得過半期居外一期若善惡著而不請許考功察

行諡之節行卓異雖無官遷兵部員外郎司勳郎中寶

及官卑者在所以聞詔可厓中考制策甚精轉兵部郎中知制誥拜中書舍人大

和四年出爲華州刺史兼御史大夫入拜左散騎常侍

兼祕書監八年轉尚書右丞九年爲兵部侍郎尋改吏

部開成元年四月卒時年六十五

贈吏部尚書

虞仲簡淡寡

欲立性方雅奕代文學達而不矜士友重之

王質字華卿太原祁人五代祖通字仲淹隋末大儒號

文中子通生福祚終上蔡主簿福祚生勉登進士第制

策登科位終寶鼎令勉生怡終渝州司戶怡生潛揚州

天長丞質則潛之第五子少負志操以家世官卑思立

名於世以大其門寓居壽春躬耕以養母專以講學爲

事門人受業者大集其門年甫強仕不求聞達親友規

之曰以華卿之才取名位如俯拾地芥耳安自苦於闢

茸者乎揚名顯親非耕稼可致也質乃白於母請赴鄉

舉元和六年登進士甲科釋褐嶺南管記歷佐淮蔡許昌梓潼興元四府累奏兼監察御史入朝爲殿中遷侍御史戶部員外郎爲舊府延薦檢校司封郎中賜金紫充興元節度副使人爲戶部郎中遷諫議大夫大和中王守澄構陷宰相宋申錫文宗怒欲加極法質與常侍崔元亮兩泣切諫請付外推申錫方從輕典質爲中人側目執政出爲虢州刺史質射策時深爲李吉甫所器及德裕爲相甚禮之事必咨決尋召爲給事中河南尹八年爲宣州刺史兼御史中丞宣歙團練觀察使在政三年開成元年十二月無疾暴卒時年六十八贈左散

騎常侍謚曰定質清廉方雅爲政有聲雖權臣待之厚而行已有素不涉朋比之議在宣城辟崔珣劉蕢裴夷直趙晳爲從事皆一代名流視其所與人士重之子曰慶存

盧簡辭字子策范陽人後徙家於蒲祖翰父綸

字允言

天

寶末舉進士遇亂不第奉親避地於鄱陽與郡人吉中

孚爲林泉之友大庾初還京師

元載取綸文以進補闕鄉尉累遷監察御史輒

辭疾去

宰相王縉奏爲集賢學士祕書省校書郎王縉兄

弟有詩名於世縉旣官重凡所延辟皆辭人名士以綸能詩禮待甚厚會縉得罪坐累久之調陝府戶曹河南

密縣令建中初爲昭應令朱泚之亂咸寧王渾瑊充京城西面副元帥乃拔綸爲元帥判官檢校金部郎中貞元中吉中孚爲翰林學士戶部侍郎典邦賦薦綸於朝會丁家艱而中孚卒太府卿韋渠牟得幸於德宗綸卽渠牟之甥也數稱綸之才德宗召之內殿令和御製詩超拜戶部郎中方欲委之掌誥居無何卒初大厯中詩人李端錢起韓翃輩能爲五言詩而辭情捷麗綸作尤工至貞元末錢李諸公凋落綸嘗爲懷舊詩五十韻敘其事曰吾與吉侍郎中孚司空郎中曙苗員外發崔補闕峒耿拾遺漳李校書端風塵追遊向三十載數公皆

負當時盛稱榮耀未幾俱沈下泉傷悼之際常暢博士
追感前事賦詩五十韻見寄輒有所酬以申悲舊兼寄
夏侯審侍御其歷言諸子云侍郎文章宗傑出淮楚靈
掌賦若吹簫司言如建瓴郎中善慶餘雅韻與琴清鬱
鬱松帶雪蕭蕭鴻人冥員外真貴懦弱冠被華纓月香
飄桂實乳溜瀝瓊英補闕思冲融巾拂藝亦精彩蝶戲
芳圃瑞雲滋翠屏拾遺興難侔逸調曠無程九醞貯彌
潔三花寒轉馨校書才智雄舉世一娉婷賭墅鬼神變
屬辭鸞鳳驚差肩曳長裾總轡奉和鈴共賦瑤臺雪同
觀金谷笙倚天方比劍沈水忽如餅君持玉盤珠寫我

懷袖盈讀罷涕交頤願言躋百齡綸之才思皆此類也
文宗好文尤重綸詩嘗問侍臣曰盧綸集幾卷有子弟
否李德裕對曰綸有四男皆登進士第今員外郎簡能
侍御史簡辭是也卽遣中使詣其家令進文集簡能盡
以所集五百篇上獻優詔嘉之簡辭元和六年登第三
辟諸侯府長慶末入朝爲監察轉侍御史文雅之餘尤
精法律歷朝簿籍靡不經懷寶厯中故京兆尹黎幹男
煇詣臺治父某縣舊業臺司莫知本末簡辭曰幹坐魚
朝恩誅田產籍沒大厯已來多少赦令豈有雪朝恩黎
幹節文況其田產分給百姓將及百年而煇恃中助而

冒論邪乃移汝州刺史裴通準大厯元年敕給百姓又

福建鹽鐵院官盧昂坐贓三十萬簡辭按之於其家得

金牀瑟瑟枕大如斗昭愍見之曰此宮中所無而盧昂

爲吏可知也李石鎮太原表爲節度判官尋轉考功員外郎轉郎中

大和中坐事自太僕卿出爲衢州刺史案新書此在節度山南東道之

後會昌中入爲刑部侍郎轉戶部大中初轉兵部侍郎

累擢湖南浙西觀察使檢校工部尚書許州刺史御史大夫忠武

軍節度使遷檢校刑部尚書襄州刺史山南東道節度

使坐事貶衢州刺史卒簡辭兄簡能

簡能字子拙登第後再辟藩府入爲監察御史大和九

年由駕部員外郎檢校司封郎中充鳳翔節度判官時
鄭注得幸李訓與之謀誅宦官俾注鎮鳳翔仍妙選當
時才俊以爲賓佐簡能與蕭俛弟傑錢起子可復皆爲
訓所選從注及訓敗注誅簡能蕭傑等四人皆爲監軍
使所害簡辭弟宏正簡求

宏正

新書名
宏止

字子強元和末登進士第累辟使府掌書

記

佐劉
悟府

入朝爲監察御史侍御史

沈傳師表爲江西團
練副使入拜侍御史

大和中華州刺史宇文鼎戶部員外郎盧允中坐賊宏

正按之文宗怒將殺鼎宏正奏曰鼎歷持綱憲繩糾之
官今爲近輔刺史以臧污聞死固常典但取受之首罪

在允中監司之責鼎當連坐文宗釋之鼎方減等三遷
兵部郎中給事中會昌末王師討劉稹時詔河北三帥
收山東州郡俄而何宏敬王元逵得邢洺磁三郡宰臣
奏議曰山東三郡以賊稹未誅宜且立留後如宏敬元
逵有所陳請則朝廷難以依違上曰然誰可任者李德
裕曰給事中盧宏正嘗爲昭義判官性又通敏推擇攸
宜卽命爲邢洺磁團練觀察留後未行而稹誅乃令宏
正衛命宣喻河北三鎮使還拜工部侍郎大中初轉戶
部侍郎充鹽鐵轉運使前是安邑解縣兩池鹽法積弊
課入不充宏正令判官司空輿至池務檢察特立新法

仍奏輿爲兩池使三年課入加倍其法至今賴之檢校
戶部尚書出爲徐州刺史武寧軍節度使徐泗濠觀察
使徐方自智興之後軍士驕怠有銀刀都九勞姑息前
後屢逐主帥宏正在鎮期年皆去其首惡喻之忠義訖
於受代軍旅無譁鎮徐四年遷檢校兵部尚書汴州刺
史宣武軍節度宋毫潁觀察等使卒於鎮贈尚書右僕射
簡求字子臧長慶元年登進士第釋褐江西王仲舒從
事又從元稹爲浙東江夏二府掌書記裴度鎮襄陽保
釐洛都皆辟爲賓佐奏殿中侍御史入朝拜監察裴度
鎮太原復奏爲記室入爲殿中賜緋半僧孺鎮襄漢辟

爲觀察判官入爲水部戶部二員外郎會昌末討劉稹
詔以許帥李彥佐爲招討使朝廷以簡求累佐使府達
於機略乃以簡求爲忠武節度副使知節度事本道供
軍使入爲吏部員外郎轉本司郎中求爲蘇州刺史時
簡辭鎮漢南宏正爲侍郎領使務昆仲皆居顯列時人
榮之旣而宰執不協宏正出鎮罷簡求爲左庶子分司
數年出爲壽州刺史九年党項叛以簡求爲四鎮北庭
行軍涇州刺史涇原渭武節度押蕃落等使檢校左散
騎常侍上柱國范陽縣男食邑三百戶十一年遷檢校
工部尚書定州刺史御史大夫義武軍節度北平軍等

使十三年檢校刑部尚書鳳翔尹鳳翔隴西節度觀察
等使十四年八月代裴休爲太原尹北都留守充河東
節度觀察等使簡求辭翰縱橫長於應變所歷四鎮皆
控邊陲屬雜虜寇邊因之移授所至撫御邊鄙宴然太
原軍素管退渾契苾沙陀三部落或撫納不至多爲邊
患前政或要之詛盟質之子弟然爲盜不息簡求開懷
撫待接以恩信所質子弟一切遣之故五部之人忻然
聽命咸通初以疾辭表章瀝懇制以太子太師致仕還
於東都都城有園林別墅歲時行樂子弟侍側公卿在
席詩酒賞詠竟日忘歸如是者累年五年十月卒時年

七十六贈尚書左僕射簡能子知猷

知猷

字子謩

登進士第釋褐祕書省正字宰臣蕭鄴鎮江

陵成都辟爲兩府記室入拜左拾遺改右補闕史館修
撰轉員外郎出爲饒州刺史入拜兵部郎中賜緋魚袋
改吏部郎中太常少卿出爲商州刺史徵拜給事中轉
中書舍人僖宗幸山南襄王僞署乃避地金州駕還徵
拜工部侍郎轉戶部判史館遷尚書右丞兵部侍郎歷
太常卿工部戶部尚書復領太常卿昭宗在華下加檢
校右僕射守太子少師進位太子太師檢校司空卒於
華下

昭宗爲劉季述所幽感憤卒贈太尉

知猷器度長厚文辭美麗尤工

書落簡措翰人爭模倣子文度位亦至丞郎

簡辭無子以簡求子貽殷元禧入繼貽殷終光祿少卿
元禧登進士第終國子博士

宏正子虔灌有俊才進士登第所著文筆爲時所稱終
祕書監簡求十子而嗣業汝弼最知名嗣業進士登第
累辟使府廣明初以長安尉直昭文館左拾遺右補闕
王鐸徵兵收兩京辟爲都統判官檢校禮部郎中卒
汝弼登進士第累遷祠部員外郎知制誥從昭宗遷洛
屬柳璨黨附賊臣誣陷士族汝弼懼移疾退居客遊上
黨遇潞府爲太原所攻節度使丁會歸降從會至太原

李克用奏爲節度副使累奏戶部侍郎太原使府有龍泉亭簡求節制時手書詩一章在亭之西壁汝弼復爲亞帥每亭中讌集未嘗居賓位西向俛首而已人士嘉之盧氏兩世貴盛六卿方鎮相繼而未有居輔相者至中興嗣業子文紀仕至尚書中書侍郎平章事

史臣曰孟襄陽之清節胡廣州之堅正卒以結權倖而敗積貨賄而亡人如面焉固難知也二崔以綱憲相傾元穎以獻奇取媚雖遭時多僻位至鼎司言之正人亦孔之醜而父事宦官何所逃譏以端綸之才任不踰元士而盧簡辭之昆仲雲搏水擊鬱爲鼎門非德積慶鍾

安能及此辭人之後不亦休哉

贊曰君子喻義小人近利孟譴胡亡家財埽地聲勢相
傾崔杜醜名端綸諸子奕葉光榮

唐書卷第二百十四